



Broj: 01,02, 03,03/11-05-1-249/15  
Sarajevo, 24.11.2015.

**KOLEGIJU PREDSTAVNIČKOG DOMA PSBiH  
KOLEGIJU DOMA NARODA PSBiH  
KOLEGIJU SEKRETARIJATA PSBiH**

**Izveštaj s 28. regionalnog zasjedanja Parlamentarne skupštine Frankofonije  
za regiju Evropa  
Saint Helier, Jersey  
12.-16. oktobar 2015.**

U Jerseyu je od 12. do 16. oktobra 2015. održano 28. regionalno zasjedanje Parlamentarne skupštine Frankofonije za regiju Evropa (u daljnjem tekstu: PSFE) u čijem radu je učestvovala i Delegacija Parlamentarne skupštine BiH.

Ovogodišnjem zasjedanju u Jerseyu prisustvovalo je oko 70 delegata iz 19 delegacija sa svih pet kontinenata te 10 eksperata. Zasjedanju je prisustvovao i šef Delegacije Parlamentarne skupštine Bosne i Hercegovine Salko Sokolović.

Nakon konferencije predsjednika sekcija, zasjedanje Regionalne skupštine svečano je otvoreno u prostorijama Parlamenta Jerseya. Članovima PSF-a obratili su se William Bailhache, predsjednik Parlamenta Jerseya, Juliette Gallichan, predsjednica sekcije Jersey pri PSF-u, Jean-Paul Wahl, predsjednik Regionalne skupštine Evropa PSF-a, te je pročitano obraćanje Pascala Terrassea, generalnog sekretara PSF-a.

Tema prve sesije regionalnog zasjedanja bila je promocija frankofonije na ostrvu koje je gotovo u potpunosti anglofono. Kao uvod u tu temu, članovima Skupštine obratio se John Kelleher, advokat, koji je govorio o historijskom pregledu razvoja službenih jezika u Jerseyu. Podsjećanja radi, službeni jezici na ostrvu Jersey su engleski i francuski. David Myatt, počasni konzul Francuske u Jerseyu, govorio je o položaju francuskog jezika na ostrvu, dok je o ulozi Francuske alijanse u Jerseyu govorila Camille Perdereau, direktorica Alijanse. Jeremy Harris, pomoćnik ministra obrazovanja, sporta i kulture u Vladi Jerseya, govorio je članovima PSF-a o planovima za uspostavljanje dvojezičke osnovne škole na ostrvu. Nakon ovih uvodnih obraćanja, članovi PSF-a razmijenili su mišljenja o položaju francuskog jezika na ovom ostrvu i načinima na koji Parlamentarna skupština Frankofonije može doprinijeti jačanju pozicije francuskog jezika u anglofonom okruženju.

Tema druge sesije zasjedanja bila je ekonomska strategija za frankofonsku Evropu. Članovi PSF-a pregledali su videoprezentaciju u kojoj je o ekonomskoj strategiji govorio Alain

Verhaagen, predsjednik Ekonomskog komiteta Stalnog vijeća Frankofonije. Zatim su se članovima PSF-a obratili stručnjaci. The Quang Dong iz Direkcije za ekonomsku frankofoniju Međunarodne organizacije Frankofonije govorio je o smjernicama iz ekonomske strategije za Frankofoniju usvojene na samitu u Dakaru 2014. godine. Miguel Zaragoza, istraživač i stručnjak za razvoj digitalne ekonomije, govorio je o razvoju digitalne industrije, dok je John Harris, predsjednik Komiteta za finansijske usluge Jersey, govorio je o ekonomskoj situaciji u Evropi i o doprinosu Jersey jačanju evropske ekonomije. Nakon uvodnih obraćanja uslijedila je rasprava i razmjena mišljenja članova PSF-a.

Drugog dana zasjedanja raspravljalo se o slobodi izražavanja, slobodi štampe te zaštiti manjina i religija. Uvodničari o ovoj temi bili su: Francois de Smet, doktor filozofije na Slobodnom univerzitetu iz Brisela, koji je govorio o tome da li su u krizi sloboda izražavanja i slobodne sudije, Anne-Marie le Pourhiet, vanredna profesorica javnog prava na Univerzitetu Rennes1, je govorila o pravnom okviru slobode izražavanja u Francuskoj. Senator Philip BAILHACHE, ministar vanjskih poslova Jersey, obratio se članovima PSF-a govoreći o slobodi izražavanja, parlamentarnim privilegijama i kleveti, dok je David Marrani, šef studija na Institutu za pravo u Jerseyu, govorio o francuskom jeziku i jezicima u Francuskoj, te izražavanju i komunikaciji u javnoj sferi. Nakon uvodnih izlaganja uslijedila je rasprava o navedenim pitanjima.

Na kraju zasjedanja predstavljeni su izvještaji o aktivnostima u regionalnim skupštinama Parlamentarne skupštine Frankofonije.

Zasjedanje je završeno takmičenjem u govorništvo mladih gimnazijalaca iz Jersey.

Na marginama ovogodišnjeg zasjedanja održana je i konferencija pod nazivom *Između francuskog i engleskog – nevjerojatna ljubavna priča* čiji su moderatori bili Henriette Walter i Philippe Guinet.

### **Izvještaj pripremio:**

**Adnan Bešić**

**Sektor za međunarodne odnose i protokol PSBiH**

Dostaviti:

- naslovu
- članovima Delegacije PSBiH u Parlamentarnoj skupštini Frankofonije
- Komisiji za vanjske poslove Predstavničkog doma PSBiH
- Komisiji za vanjsku i trgovinsku politiku, carine, saobraćaj i komunikacije Doma naroda PSBiH
- Sektoru za odnose s javnošću
- Sektoru za međunarodne odnose i protokol